

Historia cortico ariba DANDE , *archiva pa Museo Numismatico Aruba*

Den cuminsamento di añanan '70 ya caba tabata zona algun voz den scuridad:

"no laga nos DANDE desaparece"Julio Maduro †, activista cultural di su epoca, a resona su voz na 1973.

Tambe e la roga y implora pa no cambia nada di e refran pasobra nan ta original y unico. E la expresa su mes bisando cu e no ta spera cu e generacion nobo lo sinta na cas despues di tiro pa warda DANDE. Pero si e tabata kier pa e generacion nobo compronde e importancia pa nos keda cu nos tradicionnan, nos cultura y nos dushi Papiamento. Si no compronde e significado pa conserva locual ta di nos pronto lo no keda nada mas di nos Aruba.

DANDE a cuminsa sangra y casi ta muri den un periodo caminda bandanan musical di tur tipo ta hasi nan introduccion ariba nos isla y tabata organisa fiestanan di fin di anja. Esaki a pusha varios generacion leu foi nos DANDE; musica tradicional di fin di anja di tur Arubiano como tambe di tur esnan cu a hasi Aruba nan hogar. Aki nos ta wak un rato con importante integracion ta ariba nos isla chiquito. Ta facil pa cambia nos DANDE pa un ballenato, cumbia, meregue of salsa. Esaki sigur lo ta desastroso pa nos Cultura y nos identidad.

Aki ta caminda Sr. Harry Croes ta tuma paso firme pa hasi cambio ariba e olvido di DANDE y na 1973 e ta organisa e promer festival di DANDE na Aruba. Despues di e logro cu Harry ta cosecha e festival ta bira exitoso y DANDE ta ser rebiba te cu dia di awe. Biba DANDE!!

Nos isla tin e privilegio di ta e unico isla den Caribe na unda fin di anja nos tin un tradicion hopi special. Despues di tiro musiconan ta bishita cas pa cas, famia y amigonan, pa canta UN cancion specifico: DANDE.

Aki e cantante ta duna un serenda na habitantenan di e cas y ta canta na nan number. E ta deseanan tur cos bon pa aña nobo y ta improvisa den su refran pa termina su serenata. Mientras cu e cantante ta canta su sincero deseonan na e habitante, e ta cana rond cu su sombre den su man pa colecta placa pa su grupo di DANDE, algo cu tur hende ta haña normal y ta compensa e grupo pa nan tempo, esfuerzo pa mantene cultura y pa e bon deseonan.

Considerando e limitacionnan geografico di Aruba nos por conclui cu e DANDE ta un musica presenta te ainda den un forma basta original. E poco evolucion cu e por a pasa aden no ta di significante y nos por conclui cu DANDE te ainda ta nos tradition musical di fin di aña y ta den un estado bastante puro y original.

Mas interesante ainda ta e echo cu e palabra cu ta ser usa den e refran: Añi-no-be, no ta un palabra existente den nos idioma actual Papiamentu. Diferente antropologonan a haci nan studio ariba DANDE y mayoria por conclui cu DANDE a origina varios siglo pasa y cu e instrumentonan original tabata un chapi, un wiri y tambu. DANDE por bien a origina mientras cu e isla tabata ser habita pa un mescla unico di habitantenan; descendientenan di Indian, Africano y Europeo.

Awendia sin pone demasiado importancia na su origin TUR hende por disfruta di un tradicion musical cu ta di Aruba so, pesey biba DANDE y biba ARUBA.

Museo Numismatico Aruba y Fundacion Arte Aruba a cuminsa cu proyecto pa introduci nos Cultura y nos tradicionnan pa nos bishitantenan for di exterior tambe. Tin hopi turista cu ta bishitando nos isla pa mas di 10 of 20 aña y nan no conoce ni un tiki di nos cultura. Den varios hotel casi bo no por ripara si bo ta na Aruba of no. Sigur esaki ta momento oportuno ya cu e prome hotel 'highrise' ta habri porta pa museo drenta den e hotel. Hotel manera Marriott Aruba a acepta e proposicion cu man habri pasobra nan tambe kier wak cambio ariba e tereno aki pero nan kier traha atraves di un museo, esaki ta normal na otro paisnan caminda cu museonan ta hasi exposicion den area turistico tambe pa mostra mas di nan pais.

Mescos cu 'Dera Gai' a ser transporta pa hotel....awor ta toca turno na nos DANDE.

Mayan e exposition di DANDE lo inaugura y hunto cu e artistanan y invitadonan lo celebra na grandi den lobby di Aruba Marriott Resort. 13 artista total a traha obra ariba DANDE y nan lo ser exponi te cu fin di January 2006 den lobby di Aruba Marriott Resort. E obranan aki lo ta na benta pa tur bishitante di exterior como local cu ta colecciona obra cultural di Aruba. Un momento hopi significatibo lo ta momento cu Museo Numismatico Aruba ta entrega Harry Croes un plakaat como estimulo pa su trabou di rescata nos DANDE. Danki Harry pesey awe nos lo resona DANDE pa henter mundo scucha. Pabien na henter Aruba cu boso DANDE y no laga ningun circunstancia distancia nos mas di nos tradicion di fin di anja.

Desiree Croes

Museo Numismatico Aruba

563-7447